

02/06/2003

Perhimpunan Agung Umno bahas tiga usul

PETALING JAYA: Tiga usul utama iaitu pendidikan dan agama, ekonomi dan ucapan dasar Presiden akan dibahaskan pada Perhimpunan Agung Umno selama tiga hari mulai 18 Jun ini, kata Datuk Seri Abdullah Ahmad Badawi.

Timbalan Presiden Umno berkata, perwakilan ke perhimpunan itu akan berpeluang membahaskan ketiga-tiga usul itu terutama usul pendidikan dan agama yang dianggap penting.

"Kita tahu banyak perkara yang telah berlaku dalam masa setahun yang kita harap akan menarik perhatian perwakilan. Ini akan memberi peluang kepada pembahas dalam perhimpunan nanti untuk mengambil bahagian, memberi pandangan terhadap isu pendidikan dan agama.

"Persiapan untuk perhimpunan itu berjalan dengan baik, tidak ada apa-apa masalah. Jawatankuasa usul sedang giat membuat draf usul yang diperlukan untuk dibincang dan kemudian akan dikemukakan pada mesyuarat Majlis Tertinggi (MT) Umno untuk mendapat kelulusan," katanya selepas menutup Persidangan Speaker Dewan Parlimen dan Dewan Undangan Negeri seluruh Malaysia ke-32 di sini, semalam.

Mengikut atur cara menjelang perhimpunan itu, mesyuarat khas MT akan diadakan pada petang 17 Jun dan dipengerusikan Presiden parti, Datuk Seri Dr Mahathir Mohamad.

Pada jam 8 malam hari yang sama, akan berlangsung majlis perasmian serentak perhimpunan agung Pergerakan Wanita, Pemuda dan Puteri Umno, yang akan disempurnakan Abdullah.

Pada pagi 18 Jun pula, ketiga-tiga pergerakan itu akan mengadakan mesyuarat.

Pada malam 18 Jun pula, MT akan bermesyuarat untuk mendapatkan laporan daripada ketiga-tiga pergerakan itu mengenai perjalanan mesyuarat masing-masing.